

Headlines

- रक्षामंत्री राजनाथ सिंह कल किश्तवाड़ दे चिसोती ग्रां दा दौरा करगंन, जित्थे हाल च बददल फटने करी जानमाल दी बड़ी मती तबाही होई ही।
- लैफ्टिनेंट गवर्नर मनोज सिन्हा होरें सब्भनें भाषाएं पर गौह करने दा आह्वान कीता। वादीज़ हिंदी शिक्षा समीति दे आयोजन च हिंदी भाषा दे बाढ़े विस्तार लेई कीती जा रदियें कोशिशें दी सराहना कीती।
- मुखमंत्री उमर अब्दुल्ला होरें विद्यार्थियें गी रुढ़िवादी विचारधारा थमां उप्पर उठियै नमां ते उच्चा सोचने दा आह्वान कीता।
- राष्ट्रीय जांच एजेंसी कश्मीर नै शोपिया थमां हिजबुल मुजाहिदीन कन्नै तालुक रक्खने आले इक ओवर ग्राउंड वर्कर गी गिरफ्तार कीता ऐ।
- जम्मू डिविजन लेई औंदे 48एं घैंटे च भारी बरखा पौने, बददल फटने, हाड़ औने ते जिमी खिसकने दी चेतावनी जारी कीती गई ऐ।

<><><><><><>

Rajnath Singh Visit

रक्षामंत्री राजनाथ सिंह होर कल किश्तवाड़ दे चशोती ग्रां दा दौरा करगंन, जित्थे ओ बददल फटने दी घटना दे बाद चला रदे तलाशी ते राहत कम्में दा जायजा बी लैगंन। गौरतलब ऐ जे चशोती च बददल फटने दे नतीजन केई लोकें दी मौत होई गई ही ते मते सारे लापता होई गे हे। फौज दे जम्मू खेतर दे जन-सम्पर्क अधिकारी लैफ्टिनेंट कर्नल सुनील वर्तवाल होरें आकाशवाणी समाचार कन्नै गल्ल करदे होई जानकारी दिती जे रक्षा मंत्री कल जम्मू थमां चसोती लेई रवाना होगंन ते उत्थे मौजूदा स्थिति दा जायजा लैगंन। रक्षा मंत्री होर चशोती च आपदा शा प्रभावित परोआरें कन्नै गल्लबात बी करगंन। रक्षामंत्री हुंदी यात्रा गी सुचारु ते सुरक्षित बनाने आस्तै किश्तवाड़ जिले च सुरक्षा बंदोबस्त कड़े करी दिते गे न।

<><><><><><>

LG Hindi

लैफ्टिनेंट गवर्नर मनोज सिन्हा होरें आक्खेया ऐ जे भारत च भाषाएं दी बन्न-सबन्नता ते सगो-सारता राष्ट्र दी सांस्कृतिक समृद्धि गी दर्शादी ऐ। उनें आक्खेया जे पिच्छले 75एं बरें च हिंदी नै महत्वपूर्ण भूमिका निभाई ऐ ते आजादी दे संघर्ष दौरान भावनात्मक आवाज दे रुपा च कम्म करदे होई हिंदी नै राष्ट्र गी इक-जुट करने च इक अहम भूमिका अदा कीती ही। “वादी-ए-हिंद” हिंदी शिक्षा समीति आसेया आयोजत इक कार्यक्रम गी सम्बोधित करदे होई, उनें जम्मू-कश्मीर च नौजवानें च, हिंदी गी बढ़ावा देने आस्तै कीती गेदी पैहलकदमियें आस्तै कमेटी दी सराहना कीती। उनें सब्भनं गी सब्भै भाषाएं पर गर्व करने ते अपनी संस्कृति ते साहित्य सरबन्धी वरासत दी हिफाजत करने दा आग्रह कीता।

<><><><><><>

CM Youth Prog.

मुख्यमंत्री उमर अब्दुल्ला होरें आक्खेया ऐ जे विद्यार्थियें गी इक समावेक्षी ते नमां भविष्य बनाने आस्तै बड़ी ऊंचाइयें दी आकांक्षा रक्खनी लोड़चदी, रुकावटें गी पार करना लोड़चदा ते रुढ़िवादी धारणाएं शा उप्पर उठना लोड़चदा। मुख्यमंत्री होरें एह गल्ल जम्मू दे इक निजि स्कूल च टेडएक्स J.K.P.S. युवा कार्यक्रम गी सम्बोधित करदे होई आक्खी। कार्यक्रम दा विशे हा-“सीमाएं शा परे।” अपने भाषण दे दौरान मुख्यमंत्री होरें नौजवानें गी हिम्मत आहली सोच रक्खने, परिवर्तन गी अपनाने ते तब्दीली दे एजेंट दे रुपा च कम्म करने दा आग्रह कीता। इस कार्यक्रम च विद्यार्थियें दी जीवंत भागीदारी दिक्खी गई, जिनें नमैं विचारें ते मौकें दे प्रति उत्साह दे कन्नै सक्रिय तौरा पर हिस्सा लैता।

<><><><><><>

Space Day Kisht

अज्ज पूरे मुल्खै च दूआ राष्ट्रीय अंतरिक्ष ध्याड़ा मनाया जा रदा ऐ। 2023 बरे च इसै दिन चन्द्रयान-3 दे विक्रम लैंडर नै ते प्रज्ञान रोवर नै चन्नै पर सफलता कन्नै लैंड कीता हा। इस मौके पर सरकारी डिग्री कालेज किशतवाड़ ते साईंस क्लब आसेया इक विशेष प्रोग्राम दा सरिस्ता कीता गया। प्रोफेसर असमा जावेद होरें इसरो दियें उपलब्धियें ते अज्जै दे ध्याड़े दी महत्ता बारे दस्सेया। इस मौके बोलदे होई वक्ताएं देसे दे विकास च अंतरिक्ष तकनीकी भूमिका पर लोहू

पाई। विद्यार्थियों भविष्य के मिशन जियां गगनयान पर बी चर्चा कीती, जेदे नै ए आयोजन होर शिक्षाप्रद ते प्रेरणादायक बनी गया।

<><><><><><>

Lok Adalat

तौले न्यां दी दिशा च इक महत्वपूर्ण गैं पुट्टदे होई पुंछ जिले दी त्रंऊ तहसीलें च अज्ज 7 पीठें कन्नै इक बड़ी लोक अदालत दा सरिस्ता कीता गया। न्यायिक अधिकारियों, वकीलें, बीमा कर्मचारियों, मुकदमे करने आलें ते आम लोकें बड़े उत्साह कन्नै एदे च हिस्सा लैता। जिला कनूनी सेवा दे अध्यक्ष अश्वनी कुमार शर्मा होरें लोक अदालतें दे महत्व पर जोर दिता ते लोकें गी उन्दा लाह लैने आस्तै प्रोत्साहित कीता। जिला ते सेशन जज एहसान मलिक होरें दस्सेया जे अपराधिक, ब्याहें सरबन्धी मसलें ते बैंक वसूली सनें सैकड़ें मामले दा आपसी सैहमती कन्नै सफलतापूर्वक निपटारा कीता गया।

<><><><><><>

SIA OGW

कश्मीर च राष्ट्रीय जांच एजेंसी (SIA) नै बंदश आले आतंकवादी गुट हिजबुल मुजाहिदीन आस्तै स्लीपर सैल दे रुपै च कथित भूमिका दे कारण शोपिया दे दहराम इलाके थमां इक ओवर ग्राउंड वर्कर अलताफ हुसैन वागे गी गिरफ्तार कीता ऐ। SIA जम्मू-कश्मीर नै सोशल मीडिया पोस्ट च गिरफ्तारी दी जानकारी दिती ऐ। अधिकारियों दस्सेया जे वागे दे पाकिस्तान च स्थित इक आतंकवादी कन्नै कथित सरबन्ध हे ते ओ राष्ट्र दे खिलाफ गतिविधियों ते अलगाववादी विचारें गी बढ़ावा देने दे कन्नो-कन्नो देशे दे खिलाफ साजिश रचने च शामिल हा। अधिकारियों इस गिरफ्तारी गी बन्ने पार आतंकवादी नैटवर्क कन्नै जुड़े दे आतंकवादी स्लीपर सैलें गी खत्म करने दी कोशिश च इक महत्वपूर्ण सफलता करार दिता ऐ।

<><><><><><>

KIWS

अज्ज श्रीनगर दी डल झीलै च सम्पन्न होए दे पैहले-पैहले खेलो इंडिया जल खेडु उत्सव च मध्य-प्रदेश नै सब्भनें शा बद्ध तगमें हासल करियै अंकतालिका च पैहली थाहर हासल कीती ऐ। ओडीशा दूई थाहरा पर जिस्सलै के केरल त्री थाहरै पर रेया। मध्य-प्रदेश नै 18 तगमें जिते जेदे च 10 सुन्ने दे, त्रै चांदी दे ते 5 कै दे तगमे न। जिस्सलै की ओडिशा नै 10 तगमें जिते जिंदे चा 4 सुन्ने दे, 5 चांदी दे ते इक कै दा ऐ। केरल नै अपनी झोली च 7 मैडल पाए, जिंदे च त्रै सुन्ने दे, इक चांदी दा ते इक कै दा ऐ।

<><><><><><>

Ayush Ramban

आयुष विभाग रामबन आशा वर्करें गी सिखलाई आला समेयान हासल करोआइयै ते प्रोग्रामें दा आयोजन करियै उनेंगी शिक्षित करदा ऐ ते उन्दा समर्थन निर्माण करदा ऐ। ट्रेनिंग आले समेयान च राष्ट्रीय आयुष मिशन IEC समेयान शामिल ऐ। एदे कन्नै पारम्परिक भारतीय औषधियें ते एलोपैथी गी संगठित तौरा पर विकसित कीता जाई सकदा ऐ। आशा वर्करें गी सिखलाई देने दा मुख्य मकसद सेहतयाफता जीवन बारे जागरुक करना, बुनियादी सेहत सेवा हासल करोआना, सेहत ते बारे जागरुक करना ते आयुष सेवाएं दे इस्तेमाल बारे दस्सना ऐ।

<><><><><><>

Weather

मौसम विभाग दी पेशगोई मुजब अगले 48एं घैंटे च डोडा- जम्मू, कठुआ, किश्तवाड़, पुंछ, राजौरी, रामबन, रियासी, साम्बा, उधमपुर, अनंतनाग ते कुलगाम सनें कैई थाहरें पर भारी बरखा पेई सकदी ऐ। अधिकारियें विशेष रुप कन्नै जम्मू संभाग च संभावित बददल फटने, चानचक्क हाड़े ते लास-पस्सियां पौने दी चेतावनी बी दिती ऐ। जारी कीती गेदी चेतावनी 25 अगस्त तक्कर लागू रौहग। लोकें गी सलाह दिती जन्दी ऐ जे ओ सौहगे सर्तक रौहन ते लाजमी एहतियात बरतन। लोक आपदा आली स्थिति दौरान 112 नम्बर पर फौन करी सकदे न।

<><><><><><>